

光緒山西通志

仕實錄一

錄六之一

山西通志弟百四十五

賜進士出身頭品頂戴兵部侍郎兼都察院右副都御史巡撫山西提督軍務臣張煦奉
旨監修

宋羅願新安志標先達一目皆書其官以別於史傳近戴氏
震志汾州府科目後繼以仕實頗用其例實亦史家所謂列
傳者列敘人臣事蹟可傳於後世者也特史重勳位非尊官
不詳又褒貶互陳雖小過不諱志則事主徵獻意襲從長識
大而不遺細書美而不及惡爲異耳夫科目仕宦俗競稱爲
功名及核其功何以濟世名何以副實一方之大垂竹帛者
恆代不數人身沒而行弗彰者比比皆是斯則流俗之所榮
抑亦豪傑之所恥也爰仿戴書節取史傳廣搜方乘採其政
蹟可述者類輯爲篇以次鄉賢諸錄之後雖復名位不同樹

立各異要其所表見者固多足爲後來勸也

漢魏

晉

北漢前秦西燕

後魏

東西魏

北齊

北周

趙破奴太原人嘗亡入匈奴已而歸漢爲票騎將軍司馬出北地封從票侯坐酎金失侯後一歲爲匈奴將軍至匈奴水無功後一歲擊虜樓蘭王復爲浞野侯後六歲以浚稽將軍將二萬騎擊匈奴左王左王兵八萬騎圍之爲其所得遂沒其軍復與其子安國亡入漢

太原府

郅都河東楊人

漢書誤大陽人

以郎事文帝景帝時爲中郎將敢直

諫面折大臣於朝嘗從入上林賈姬在廁野彘入廁上目都都不行上欲自持兵救賈姬都伏上前曰亡一姬復一姬進天下所少甯姬等耶陛下縱自輕柰宗廟太后何上還彘亦不傷賈姬太后聞之賜都金百斤上亦賜金百斤由此重都

濟南閭氏宗人三百餘家豪猾二千石莫能制拜都爲濟南
守誅閭氏首惡餘皆股栗居歲餘郡中不拾遺旁十餘郡守
畏都如大府都爲人勇有氣公廉不發私書問遺無所受請
寄無所聽常稱曰已背親而出身固當奉職死節官下終不
顧妻子矣遷爲中尉丞相條侯至貴倨都嘗揖之是時民樸
畏罪自重而都獨先嚴酷致行法不避貴戚列侯宗室見都
側目而視號曰蒼鷹臨江王徵詣中尉府對簿欲得刀筆爲
書謝上都禁吏弗與魏其侯使人問子之臨江王旣得爲書
謝上因自殺竇太后聞之怒以危法中都都免歸家景帝使
使卽拜都爲雁門太守便道之官得以便宜從事匈奴素聞
郅都節爲引去竟都死不近雁門匈奴至爲偶人象都令騎
馳射莫能中其見憚如此匈奴患之乃中都以前漢法景帝曰

都忠臣欲釋之竇太后曰臨江王獨非忠臣乎於是斬都陽

馮譚潞人奉世長子太常舉孝廉爲郎功次補天水司馬奉

世擊西羌譚爲校尉隨父從軍有功未拜卒

路安府

趙綰代人嘗受詩申公爲御史大夫與蘭陵王臧請立明堂以朝諸侯不能就其事乃言其師申公武帝使使東帛加璧安車駟馬迎申公至以爲大中大夫舍魯邸議明堂事竇太后喜老子言不悅儒術得綰臧之過以讓上上因廢明堂事下綰臧吏皆自殺

大同府

荀彘太原廣武人以善御見爲侍中用校尉數從大將軍元

封二年爲左將軍擊朝鮮無功坐捕樓船將軍誅

代州

周叔魏王豹將漢三年豹反漢漢以韓信爲左丞相擊魏信

問鄴生魏得毋用周叔爲大將乎曰柏直也信曰豈子耳遂
進兵擊魏虜豹定河東

張次公河東人以校尉從大將軍封岸頭侯其後太后崩爲

將軍軍北軍後一歲大將軍凡再爲將軍後坐法失侯

解州上

李沮雲中人事景帝武帝十七歲以左內史爲彊弩將軍後
一歲復爲彊弩將軍

郭昌雲中人以校尉從大將軍元封四年以大中大夫爲拔

胡將軍屯朔方

以上托
克托磨

路博德西河平州人以右北平太守從票騎將封邳離侯票
騎死後博德以衛尉爲伏波將軍伐破南越益封其後坐法
失侯爲彊弩都尉屯居延卒

孫會宗西河人有智略爲安定太守嘗與華陰楊惲書諫戒

之爲言大臣廢退當闔門惶懼爲可憐之意不當治產業通
賓客有稱譽憚不能改後遇禍會宗以與憚厚善免官以上
多斯部

右漢十八

李仲房太原人馮衍集曰鮑永行將軍事安集并州擁兵屯
太原與太原李仲房同心并力太原府

王卓字仲遼河東解人陽嘉三年以光祿勳代孔扶爲司空

永和二年卒蒲州府

王敏字叔公并州隰城人永平中爲大司農十六年代邢穆
爲司徒明年卒汾州府

賈丹霍匡解勝皆雁門人爲盧芳將尹由所掠由以爲將帥
與共守平城丹等聞芳敗遂共殺由詣太守郭涼涼上狀皆

封爲列侯

朔平府

儲大伯河東人建武初爲諫議大夫使持節徵鮑永詣行在所永疑不從收繫大伯封所持節於晉陽傳舍壁中遣使馳至長安旣知更始亡乃出大伯因節信封上將軍列侯印綬悉罷兵

解州

裴遵解邑君陵裔孫歷燉煌太守自雲中從光武平隴蜀徙居安邑安順之際徙聞喜曾孫煜并州刺史度遠將軍子茂裴茂字巨光靈帝時歷縣令郡守尙書建安初以奉使率導關中諸將討李傕有功封列侯子綰官至尙書令其族爲中眷輯獻帝時爲司空其族爲東眷

絳州

右後漢九人

靳詳太原人仕蜀嘗從諸葛亮圍魏陳倉亮使說魏西河將

郝昭降昭不從

太原府

右蜀漢一人

浩周字孔異上黨人建安中爲蕭令至徐州刺史後領護于禁軍軍沒爲關公所得孫權襲南郡并得周甚禮之魏文初權遣周偕東里袞還有詔皆見之周以爲權必臣服而東里袞謂其不可必服上悅周言是歲冬使周與冊吳王使者偕往周既致詔命與權私晏曰陛下未信王遣子入侍也周以閤門百口保之權因字謂周曰浩孔異卿乃以舉家百口保我我當何言耶遂流涕沾襟及與周別又指天爲誓上謂周爲得其真而權竟無遣子意周遂見疎

洛安府

董經河東人魏時爲議郎出爲安定太守特嘉焦先奇節與先非故人欲密往觀之而司馬景王亦遣經因事過視先經

到奮其白鬚爲如與之有舊者曰阿先闊乎念共避白波時
否先熟視不言經素知其昔受侯武陽恩因復曰念武陽否
耶先曰已報之矣經又復挑欲與語遂不肯應經歎以爲大
賢

州解

秦朗字元明新興人父宜祿爲呂布使詣袁術術妻以漢宗
室女後歸降爲銍長隨蜀將張飛去行數里欲還遇害朗少
隨母杜氏畜于公宮曹公甚愛之及長游遨諸侯間歷武文
之世而無尤也明帝初授以內官青龍元年五月爲驍騎將
軍將中軍討步度根寇走漠北十月步度根部落戴胡阿狼
泥等詣并州降朗引軍還遷給事中出入常隨從上每顧問
多呼其小字阿蘇數加賞賜爲起大第於京城中富均公侯
後劉放孫資薦司馬懿曹爽輔齊王乃罷朗官于秀

州

右魏三人

郭配字仲南陽曲人晉諸公贊曰淮弟配有重名位至城陽太守裴秀賈充皆配女婿子展字泰舒有器度幹用厯職著績終太僕次弟豫字泰甯相國參軍知名早卒配弟鎮

南謁者僕射鎮子奕字泰業山濤啟事稱奕高簡有雅量厯位雍州刺史尙書

溫充太原祁人嶠從弟嶠討蘇峻與庾亮相推爲盟主充言於嶠曰陶征西位重兵彊宜共推之乃遣王愨期奉侃爲盟主侃以兵下遂平賊

溫放之嶠子嗣始安郡公少厯清官累至給事黃門侍郎以貧求爲交州許之王述與會稽王牋曰放之溫嶠之子宜見優異而投之嶺外竊用愕然願遠存周禮近參人情則望實

惟允不納放之既至南海甚有威惠將征林邑交趾太守杜
寶別駕阮朗不從放以其阻眾誅之勒兵進遂破林邑而還
卒於官弟式之新建縣侯散騎常侍

以上太原府

衛操字德元代人少通俠有才略習征北將軍衛瓘以爲牙
門將後與從子雄及其宗室鄉親姬澹等歸代說猗玁猗廬
兄弟招納晉人猗玁以爲輔相任以國事稍遷至右將軍封
定襄侯立碑於大邗城南以頌桓帝功德文有曰輔相二衛
對揚毗翼操展文謀雄奮武烈操以穆帝三年卒始操所與
宗室鄉親入代者衛勲安樂亭侯衛崇衛清並都亭侯衛沈
段繁並信義將軍都鄉侯王發建武將軍都亭侯班范折衝
將軍廣武亭侯賈慶建武將軍上洛亭侯賈循都亭侯李壹
關中侯郭乳關內侯皆猗玁所表授也後多隨劉琨子遵南

山四通志卷一百四十五 石像記
奔衛雄姬澹莫含等名皆見碑

莫含雁門繁峙人劉琨爲并州辟從事舍居近塞下常往來
代北猗盧愛其才器善待之及爲代王備置官屬求含於琨
琨遣之含心不願琨諭之曰當今胡寇滔天泯滅諸夏惟此
一州介在羣胡之間能存立者賴代王之力是以傾身竭寶
長子遠質覬滅殘賊卿爲忠節亦是奮義之時何得苟惜共
事之小誠忘出身之大益入爲代王腹心非但吾願亦一州
所賴含乃入代甚爲猗盧所重常參軍國大謀卒於左將軍
關中侯琨徙五縣之民於陜南含家獨留其故宅在桑乾川
南世稱莫含壁或音訛謂之莫回城云

以上大同府

衛展字道舒安邑人歷尚書郎南陽太守永嘉中爲江州刺史累遷晉王大理詔有考子證父或鞭父母問子所在展以

爲恐傷正教並奏除之元帝初爲廷尉上疏宜復肉刑卒贈

光祿大夫

以上
解州

右晉六人

陳元達字長宏後邵人也少孤貧有志操常躬耕兼誦詩書樂道行詠忻忻如也至年四十不與入交通劉淵之爲左賢王聞而招之元達不答及淵僭號徵爲黃門郎在位忠審屢進讜言退而削草雖子弟莫得知也聰旣嗣位轉爲廷尉聰將爲后劉氏起鸚鵡儀樓於後庭元達鎖腰切諫聰大怒命左右將出斬之大司徒任顗等叩頭流血請免劉氏亦手疏切諫聰意乃解引元達而謝之每謂元達曰卿當畏朕而反使朕畏卿也遷爲左司隸聰欲立左右貴嬪爲左右皇后元達以三后並立殊非典禮極言諫之聰不納乃轉爲右光祿大

夫於是太尉范隆等皆抗表遜位請讓元達聰復以爲御史大夫儀同三司元達素與太宰河間王劉易善引之爲援得盡諫諍及聞易死哭之悲慟曰人之云亡邦國殄悴吾旣不復能言安用此默默苟生乎歸而自殺時人莫不寃之

李景年字延祐前部人少孤貧養於叔父嘗使牧羊景年見其叔子講誦羨之後從博士乞得百餘字牧羊之暇折草木寫之叔乃驚曰吾家千里駒也而令麒麟久躐鹽坂乃令娶妻授學遂歸仕淵長平之戰聰馬中流矢幾爲晉軍所獲景年以馬授聰揮戈直前得免於難以功封梁鄒侯歷虎牙將軍

喬智明字元達匈奴前部人少喪二親哀毀過禮仕淵爲折衝將軍遷廷尉轉冠軍大將軍領單于右輔聰嗣位加司隸

校尉嘉平三年從中山王曜攻長安城陷不爲設備爲晉將
麴允所殺

右北漢三人

案晉志單于東西南北中五部北部居新興南部居蒲子此所云後部卽

北部分部也

張蚝本姓弓上黨注人膂力過人能卻曳牛走城無高下皆
可超越張平愛之養以爲子嘗因平妾割勢以自誓遂爲閹
人銅壁之戰蚝單馬大呼出入秦陣者四五堅募人生致之
鷹揚將軍呂光刺蚝中之前鋒郅羌擒以獻平懼請降堅拜
平右將軍以蚝爲虎賁中郎將加廣武將軍從楊安拔苻廋
於陝城王猛伐燕蚝以虎牙將軍受猛節制楊安攻晉陽不
克猛使蚝爲地道帥壯士數百潛入城中大呼斬關克之時
猛衆止六萬而燕師三十萬蚝與徐成等跨馬運矛馳赴燕

陣出入數四旁若無人殺傷甚衆戰至日中燕兵大敗乘勝
逐北猛遂滅燕以功進前將軍袁瑾守壽春爲桓溫所圖遣
使請救堅遣蚝與王鑒率步騎二萬救之鑒據洛澗蚝屯八
公山桓溫遣將夜襲鑒蚝乃退屯慎城建元十二年以前禁
將軍同鄧羌等帥步騎二十萬與行唐公洛會兵攻代代王
逆戰不勝退遁陰山後度漠南蚝與李柔勒兵赴之部衆逃
潰遂平代地振旅而還十四年爲并州刺史十五年入爲後
將軍十八年晉楊亮攻涪城堅遣蚝帥兵救之蚝出斜谷亮
引兵退建元末大舉伐晉蚝以驃騎將軍爲前鋒敗謝丕於
淝南謝元謝掾勒兵數萬陳以待之蚝退列陳逼淝水晉師
不得渡陽平公融因謝元之請渡軍卻陣勢不能止遂大敗
堅至洛遣蚝率羽林五千戍并州長樂公丕率男女六萬進

如潞川蚝同并州刺史王騰迎入晉陽始知五將凶聞發喪
舉哀丕稱號進蚝爲司空侍中封上黨郡公王永宣檄州郡
推蚝爲中軍都督其見重如此蚝方面勦亞鄧羌時人咸曰
鄧羌張蚝胥萬人敵也

澤州府

王施河東人爲秦征南主簿苻丕圍襄陽御史中丞李柔劾
丕師老無功請徵下廷尉苻堅遣黃門郎韋華持節切讓丕
等仍賜以劔曰來春不捷汝可自裁不足復持面見吾也衆
咸疑懼莫知所爲施進曰以大將軍英秀諸將勇銳以攻小
城何異洪爐燎毛羽所以緩攻欲以計制之若決一旦之機
可指日而定今破襄陽上明自遁復何所疑願請一旬之期
以展三軍之勢如其不捷施請爲戮首丕於是促圍攻之太
元四年遂陷襄陽執晉南中郎將朱序

解州

右前秦二人

張騰太原人爲慕容永中書侍郎慕容垂攻崔釗於滑臺釗請救永尙書郎渤海鮑遵曰徐觀其後卞莊之舉也騰曰強弱勢殊何弊之有不如救之成鼎峙之勢可引兵趣中山豈多疑兵夜倍其火彼必懼而還師我衝其前釗攝其後此天授之機不可失也永不從釗敗降垂而垂遂入攻臺壁

太原府

右西燕一人

郝軒太原人世名知人嘗稱清河崔元伯有王佐之才代所未有也苻堅亡元伯避難齊魯軒歎曰斯人而遇斯時不因扶搖之勢而與鸚鵡雀飛沈豈不惜哉元伯後仕魏爲天部大人配饗太祖廟庭

郭元貞太原人爲魏揚州刺史太安王絃年十三元貞見而

撫之曰汝讀何書對曰誦孝經曰孝經云何絃曰在上不驕爲下不亂元貞曰吾作刺史豈其驕乎絃曰公雖不驕君子防未萌亦願留意元貞稱善

王靜太原人自廷尉監遷少卿廷尉正博陵崔纂恥居其下乃與靜書辭氣抑揚無上下之體

尔朱天光秀容人榮從祖兄子少勇決榮特親愛之常預軍戎謀孝昌末榮據并肆以天光爲都將總統肆州兵馬榮向洛京委以後事建義初爲肆州刺史封長安縣公榮討葛榮留天光并州曰我身不得至處非汝無以稱我心永安中與元天穆東破邢杲元顥入洛與天穆會榮於河內榮發後并肆不安詔兼尙書僕射爲并肆等九州行臺仍行并州事天光至部分約勒所在甯輯還京改封廣宗郡公初万俟醜奴

并胡琛建義元年夏遂擊擒蕭寶夤於靈州僭大號除天光
使持節都督雍州刺史率大都督賀拔岳侯莫陳悅等討之
天光初行唯有軍士千人時東雍赤水蜀賊斷路入關擊破
之使取壯健至雍又稅人馬合得萬匹以軍少停留未進榮
遣杖之百復遣軍士二千人赴之天光令賀拔岳率千騎先
驅至岐州擒其行臺尉遲菩薩醜奴棄岐州走還安定天光
發雍至岐與岳合勢破醜奴獲蕭寶夤於是涇幽二夏北至
靈州及賊黨並降唯賊行臺万俟道洛西依牽屯山據險自
守榮復遣使杖之百削爵爲侯天光與岳悅等復向牽屯討
之道洛戰敗投略陽賊帥王慶雲慶雲自稱尊號以道洛爲
大將軍天光乃入隴至慶雲所居永洛城破其東城賊遂併
趣西城城中無水衆聚熱渴天光密使軍人作木槍各長七

尺至昏布立人馬爲防衛之勢又伏人槍中其夜慶雲道洛果突出至槍馬各傷倒伏兵起同時擒獲賊窮乞降悉阮之死者萬七千人分其家口於是三秦河渭瓜涼鄯善咸來款順詔復前官爵榮死莊帝進天光爵廣宗王及問兆已入洛乃輕騎向都見世隆等尋還雍節閔帝加開府儀同三司尙書令關西大行臺天光北出夏州遣將討宿勤明達擒送洛信都兵起世隆累使徵之不從後令斛斯椿苦邀之天光不得已東下與仲遠等敗於韓陵斛斯椿拒河橋天光不得度西北走被執送洛遇害尔朱氏各據一方賞罰自出而天光有定關西之功差不酷暴比之兆與仲遠爲不同矣

尔朱彥伯榮從弟祖侯眞文成時并安二州刺史始昌侯父買珍宣武時武衛將軍華州刺史彥伯性和厚永安中爲榮

府長史節閔潛龍花佛寺彥伯敦喻往來尤有勤款余朱兆以不豫立帝謀大爲忿恚世隆令彥伯往喻之兆乃止及還帝譙彥伯於顯陽殿令與侍中源子恭極醉而罷後封博陵郡王位司徒公時早上表遜位詔許之俄除儀同三司侍中餘如故彥伯於兄弟中差無過患韓陵敗欲領兵屯河橋世隆不從尋與世隆同誅

以上太原府

薛辯字允白河東汾陰人後秦左戶部尙書強子幼而儁爽倜儻多大略豪傑多歸慕之強卒復襲統其營仕姚興厯太子中庶子河北太守棄歸保鄉邑晉將劉裕署相國掾除平陽太守委以北道鎮捍及長安失守遂歸魏仍立功於河際位平西將軍東雍州刺史賜爵汾陰侯諡闕明元深加器重曰朕委卿西蕃志在關右卿宜克終良算與朕爲長安主人

辯務農教戰恆以數千之衆摧抗赫連氏又除并州刺史徵授大太常七年卒於官帝深悼惜之贈并雍二州刺史

薛允字甯宗汾陰人拔子少有父風弱冠拜中散襲爵鎮西大將軍河東公除懸瓠鎮將尋授持節義陽道都將後除立忠將軍河北太守羣盜懾氣郡中清肅卒於郡謚曰敬子裔字豫孫襲爵性豪侈卒於洛州刺史子孝紳襲位大中大夫贈華州刺史

薛眞度汾陰人與從兄安都南奔又從來降爲上客太和初賜爵河北侯平州刺史假陽平公後降伯厯荊州東荊州刺史每獻計勸先取樊鄧後攻南陽故大爲帝所賞改封臨晉縣伯轉豫州刺史景明初豫州大饑表請別出倉米五千斛爲粥救之詔曰眞度所表甚有愛濟百姓之意宜在拯卹厯

華荊二州刺史入爲大司農卿正始初除陽州刺史金紫光祿大夫加散騎常侍改封敷西卒贈左光祿大夫謚莊有子十二人嫡子懷微襲

以上蒲州府

穆崇代人道武居獨孤部往來奉給時人無及者劉顯之逆平文皇帝外孫梁眷密遣崇告道武曰顯若知之雖刀劒刳割勿泄也崇來告難道武馳如賀蘭部窟咄之難崇外甥于植等謀不軌崇夜告道武道武誅植等後從平中原位侍中豫州刺史太尉宜都公天賜三年卒謚丁公長子逐留賜爵零陵侯後罪廢子乙賜爵富城公卒於侍中謚曰靜子眞尙長城公主拜駙馬都尉後離婚位南部尙書侍中卒謚曰宣孝文追錄功臣命崇配饗又令著作郎韓顯宗與眞選定碑文建於白登山

賀狄干代人世爲將以平當稱稍遷北部大人登國初與長孫嵩爲對明於聽察爲人愛敬道武遣狄干致馬千匹結婚於姚萇會萇沒興立因止狄干道武遙賜爵襄武侯加秦兵將軍後擒興將狄伯支等興以駿馬千匹贖伯支而遣狄干還道武見其言語衣服類秦以爲慕而習之因被害

賀訥代人魏道武皇帝之舅獻明后之兄也祖紇尙平文女父野干尙昭成女遼西公主昭成諸部紛擾獻明后與道武及衛秦二王依訥會苻堅使劉庫仁分攝國事道武還居獨孤訥總東部爲大人遷居大甯行其恩信衆多歸之侔於庫仁苻堅假訥鷹揚將軍劉顯之難道武輕車歸訥訥驚拜曰官家復國當念老臣帝笑答曰誠如舅言要不忘也後與諸大人勸進道武登代王位於牛川從平中原拜安遠將軍以

山西通志卷一百四十五 金一
元舅甚見尊重然無統領以壽終於家

莫題繁時人舍孫也父顯昭成世左常侍題事道武爲大將
以功賜爵東宛侯黜爲濟陽太守後規度平城四方數十里
將模鄴洛長安宮室以題機巧徵令監之題久侍頗忘賜死
弟雲好學善射道武時常典選曹賜爵安德侯遷執金吾參
軍國謀議太武克赫連昌留鎮統萬進爵安定公雲撫慰新
舊皆得其所卒謚敬公

奚眷代人少嫺將略道武世有戰功明元時爲虎牢鎮將寇
憚之太武時賜爵南陽公爲都曹尙書及征蠕蠕詔督偏將
出別道會鹿海以後期斬爵除

娥清代人少有將略著戰功稍遷給事黃門侍郎明元南巡
爲中領軍將軍與宋兵將軍周幾等渡河略地至胡陸以功

賜爵須昌侯鎮枋頭太武初還進東平公後從平統萬遂與奚斤討赫連昌至安定昌弟定西走斤追之清欲尋水往斤不從遂爲定擒克平涼乃得還後與古弼東討馮宏以不急戰黜爲閭卒卒於家子延賜爵南平公

穆壽觀子襲爵尙樂陵公主拜駙馬都尉明敏有父風太武受重之擢下大夫敷奏機辯有聲內外遷侍中中書監領南部尙書進爵宜都王加征東大將軍壽辭曰臣祖崇先皇之世屢逢艱危幸天贊梁眷誠心先告故得效功前朝流福於後昔陳平受賞歸功無知今眷元勳未錄臣獨奕世受榮豈惟仰愧古賢抑亦有虧國典太武嘉之乃求眷孫賜爵郡公征涼州命輔景穆總錄機要內外聽焉次雲中將濟河帝別御靜室召壽曰蠕蠕吳捷來伏兵漠南殄之爲易壽信卜筮

言不設備吳提果至壽欲築西郭門請景穆避保南山惠保
太后不聽乃止遣司空長孫道生等擊之獲無損傷景穆監
國與崔浩等輔政卒贈太尉諡曰文宣子平國襲尙城陽長
公主拜駙馬都尉侍中中書監爲太子四輔卒子伏干襲尙
濟北公主拜駙馬都尉卒諡康無子平國弟正國尙長樂公
主拜駙馬都尉子平城早卒與始平公主冥婚贈駙馬都尉
子洛拔代人栗磾子有姿容善應對拜侍御中散太武甚加
愛寵因賜名焉轉監御曹令景穆在東宮厚加禮遇洛拔恆
畏避不敢結納襲爵爲侍中尙書令百寮憚之卒官有六子
次果嚴毅直亮有父兄風歷朔華并恆四州刺史賜爵武城
子次勁字鍾葵第三子頗有武略位沃野鎮將賜爵富昌子
宣武納其女爲后封太原郡公後爲征北將軍定州刺史卒

贈司空諡恭莊自栗磾至勁累世貴盛一皇后四贈公三領
軍三尚書令三開國公勁雖后父但以順后早世竟不居公
輔

周觀代人驍勇有膂力太武以軍功賜爵金城公位高平鎮
將善撫士卒號有威名後拜內都大官出爲秦州刺史撫馭
失和部人薛永宗聚衆汾曲以叛觀討之爲流矢所中太武
幸蒲坂觀驚而起創重卒爾除

呂洛拔代人曾祖渴侯昭成時歸魏父匹知太武時爲西部
長封榮陽公洛拔以壯勇知名文成末爲平原鎮都將隨尉
元攻宋將張永大敗之賜爵武城侯卒子文祖補龍牧曹奏
事中散以舊語譯註皇誥辭義通辯爲外都曹奏事中散後
坐法

尉多侯代人眷子少有武幹獻文時假節領護羌戎校尉敦煌鎮將至求輕騎五千西入于闐兼平諸國弗許孝文初又求北取伊吾斷蠕蠕通西域路帝善其計以東作方興難之爲妻所害多侯弟子慶賓善騎射稍遷大中大夫明帝時送蠕蠕阿那瓌還國上表固爭不從後拜肆州刺史時介朱榮兵威漸盛經肆州慶賓惡之據城不納榮襲之拘還秀容後還都起爲光祿大夫督鎮汝陰卒贈司空子瑾

山強代人美容貌身長八尺五寸工騎射彎弓五石爲奏事中散從獻文獵方山有兩狐起于御前強射之百步內二狐俱獲位內行長子幼之金明太守

閭毗代人太武時自蠕蠕國來附卽恭皇后之兄也后生文成大安二年以毗爲平北將軍賜爵河東公弟紇爲甯北將

軍賜爵零陵公並加侍中進爵王毗征東將軍評尚書事紇
征西將軍中都大官子弟王二人公五人侯六人子三人同
時受拜和平二年追諡后祖父延定襄康公辰定襄懿王毗
卒贈太尉追贈毗妻河東王妃子惠襲紇卒贈司空子豆賜
名莊太和中初立三長以莊爲定戶籍大使甚有時譽十六
年例降公後爲七兵尚書卒紇弟染外都大官冀州刺史江
夏公卒

陸昕之字慶始代人麗孫定國子風望端雅襲爵例降公尙
獻文女常山公主拜駙馬都尉歷通直郎景明中以從叔琇
事免尋以主婿除通直散騎常侍歷充青二州刺史並有政
績轉安北將軍相州刺史卒贈鎮東將軍冀州刺史諡惠初
定國二室河東柳氏生安范陽盧氏生昕之後兩子爭襲

僕射李冲勛所之由是承爵尙主爲孝文所親宣武時年未四十頻燕三藩當世以爲榮公主無男以昕之從兄希道子彰爲後

裴儁字標顯代人居洛陽孝莊時仕累遷滄州刺史吏人畏悅除太僕卿尔朱世隆等誅議所立儁避席曰廣陵王雖爲尔朱軼戴當今之聖主也及孝武帝入關齊神武深思儁言常以爲恨尋除御史中尉僕射賈顗度途遇排儁驛列倒儁入奏之加散騎常侍驛騎大將軍左光祿大夫儀同三司儁善解斯椿賀拔勝勝出鎮荊州過儁別見儁敗虜敵被勝還之錢物後兼吏部尙書復爲滄州刺史徵還兼中尉章武縣伯除殷州刺史卒贈司空公諡文貞子洪實字巨正位尙書左右郎魏郡邑中正卒官

奚康生本姓達奚世居代徙陽翟祖直柔元鎮將內外三都
大官賜爵長進侯卒贈幽州刺史謚簡康生少驍武彎弓十
石矢異常箭太和初蠕蠕頗寇康生爲前驅軍主壯氣有聞
由是爲宗子隊主從征鍾離駕旋濟淮五將未度齊將據渚
斷津路募破中渚賊者以爲直閭將軍康生應募轉棧積柴
因風放火燒其船艦依煙直過飛刀亂斫投河溺死者甚衆
乃假康生直閭將軍後以勳除太子三校西臺直後吐京胡
自號辛支王康生從章武王彬討之分爲五軍四軍俱敗康
生軍獨全率精騎一千追胡至車突谷詐墜馬胡爭欲取之
康生騰騎奮矛殺傷數十人射殺辛支復爲統軍從王肅攻
義陽齊將張伏護自昇城樓言辭不遜康生望樓射窗扉開
卽入應箭而斃齊將裴叔業圍渦陽馳往一戰大破之及壽

春降康生馳赴之破走其將桓和陳伯之以功除征虜將軍封安武縣男出爲南青州刺史後梁郁州徐濟寇邊破擒之梁遣都督臨川王蕭宏勒甲十萬規寇徐州詔授武衛將軍一戰破之出爲華州刺史頗有聲績轉涇州刺史以劾削官爵尋復之梁郁州內附詔康生迎接未發大舉征蜀假安西將軍卽趣綿竹至隴右班師後除相州刺史徵拜光祿勳領右衛將軍與元乂同謀廢靈太后遷河南尹仍右衛領左右予雖娶左衛將軍侯剛女卽元乂妹夫也乂深相委託以難爲千牛備身而康生言氣高下乂稍憚之正光二年二月明帝朝靈太后於西林園文武侍坐酒酣迭舞次至康生乃爲力士舞及折旋每顧視太后舉手蹈足瞋目領首爲殺縛勢太后解其意而不敢言日暮太后欲攜帝宿宣光殿侯剛沮

之康生曰至尊陛下兒隨陛下將東西更復訪問誰羣臣莫敢應靈太后自起援帝臂下堂而去康生大呼唱萬歲明帝引前入閣左右競相排閣不得閉康生奪其子難千牛刀斫直後元思輔乃得定明帝既上殿康生將出處分遂爲父所執鎖於門下又與剛並在內矯詔決康生罪難恕死從流哭拜辭父康生慷慨了不悲泣曰我不反死汝何爲哭也死時年五十四子難徙安州後又令殺之靈太后反政贈都督冀瀛滄三州諸軍事驃騎大將軍司空冀州刺史諡武貞追封壽張縣侯子剛襲以上大同府

叱列延慶代西部人娶尔朱世隆姊普泰初兼尙書左僕射山東行臺封北海郡公時幽州刺史劉靈助舉兵節閔以延慶與大都督侯深於定州討之深以靈助善占百姓信惑欲

還師入據關拒險以待其變延慶以靈助庸人彼皆恃其妖術甯肯戮力致死宜詭言西歸可襲而擒深從之乃出頓城西聲云將還詰朝造靈助壘遂破擒之韓陵敗與尔朱仲遠走度石濟仲遠南竄延慶北降後爲中軍大都督孝武之西齊神武殺之

以上朔平府

關勝字寶顓石艾人爲冀州刺史有武定八年紀德碑

平定州

段榮雁門原平人雍州別駕兄弟諸從世居廣武城修飾有士風劉淵石勒之亂桓帝匡助晉氏桓帝崩衛操立碑大邗城南以頌功德皇興初榮於大邗溝掘得其碑

以上代州

柳元達河東解人涉獵經史仕齊諸王參軍與裴叔業姻婭叔業獻款元達贊成其計入魏除司徒諮議參軍封南頓縣子卒改封夏陽子絳製絳弟遠字季雲好彈琴耽酒時有文

詠孝武初除儀同開府參軍事放情琴酒每出行返家人忽問消息答云無所聞縱聞亦不解後客游卒

州

裴懷古聞喜人嘗懷軫姚儁諸蠻歸者日千計又使於突厥抗節不少挫徙居壽春爲并州都督長史吏民懷之後召去再爲并州州民扶老攜幼出迎時稱清介

裴定宗河東人高允爲祕書監定宗與河間邢祐北平陽蝦廣平程駿金城趙元順等爲著作佐郎俱爲稱職並號長者裴宣字叔令聞喜人駿次子少孤事母兄以孝友稱通辯博物司空李冲見而重之孝文初徵爲尙書主客郎累遷太尉長史請令州郡戍邏埋掩骸骼并符出兵之鄉使招魂附祭復其年租傷痍者免其兵役從之出爲益州刺史至州綏撫甚得戎羌之心宣常慕廉退謂親賓曰吾本無當世志直隨

牌至此祿厚養親效不光國可以言歸矣因奉表求解不許乃作懷田賦以敘心焉卒贈豫州刺史諡曰定尋改穆

裴叔業聞喜人魏冀州刺史徽之後也五世祖苞晉秦州刺史祖邕自河東居襄陽父順宗兄叔寶仕宋齊有名叔業少
有器幹頗以將略自許宋元徽末爲羽林監齊初累遷南蠻
長史廣平太守魏孝文南次鍾離齊拜徐州刺史以水軍入
淮帝令郎中裴聿往與語叔業盛飾服玩聿曰伯父衣服誠
爲美麗但恨不盡游爾廢帝卽位徙南兗州刺史會陳顯達
圍建鄴遣司馬李元護應之兄子植殿瑜璆等弃母奔壽陽
叔業遣信詣豫州刺史薛真度訪入北之宜真度答書盛陳
朝廷風化乃遣子芬之及兒女夫韋伯昕奉表內附景明元
年正月詔授使持節散騎常侍都督豫州刺史征南將軍封

蘭陵郡公遣彭城王勰尙書令王肅赴接軍未度淮叔業卒
李元護席法友等推叔業兄子植監州事詔贈驃騎大將軍
開府儀同三司諡忠武給東園溫明祕器子禧之字文德仕
齊先卒子譚紹封國祿歲入每以分贍諸叔位輔國將軍中
散大夫卒贈南豫州刺史諡敬芬之字文敬長者好施篤愛
諸弟仕齊位羽林監入魏封上蔡伯爲東秦州刺史在州有
清靜稱遷岐州刺史隗賊陷城爲莫折念生所害贈青州刺
史叔業長兄子彥先少有志尙叔業入魏封邱縣子位渤海
相卒諡惠恭子約別有傳

裴植叔業兄叔寶子也少而好學覽宗經史尤長釋典善談
理義叔業卒席法友柳元達等共舉植監州祕叔業喪間教
命處分皆出於植於是開門納魏軍詔以植爲兗州刺史崇

義縣侯入爲大鴻臚卿尋授揚州大中正瀛州刺史再遷度支高書加金紫光祿大夫植嘗言人門不後王肅怪朝廷處之不高及爲尙書志意頗滿欲以政事爲己任謂人曰非我須尙書尙書須我詞氣激揚見於言色嘗表毀征南將軍田益宗不應在百世衣冠之上侍中于忠黃門元昭寢而不奏時忠專權搆成其禍矯詔殺之朝野稱冤臨終神志自若後故吏渤海勾冲上疏訟之昭尙書僕射揚州刺史子懷襲裴巖植弟壯果有謀略在齊以軍功位驍騎將軍入魏爲南司州刺史封義安縣伯詔命未至被害進爵爲伯子炯不得襲封明帝初乃封城平縣伯炯字休光小字黃頭頗有文學除鎮遠將軍散騎常侍揚州大中正進爵侯尋兼尙書右丞出爲東郡太守爲城人所害贈散騎常侍青州刺史諡簡炯

子斌參軍斌子堪歷尚書郎

裴粲字文亮颺弟封舒縣子沈重善風儀歷正平恆農二郡太守高陽王維曾以事屬粲粲不從後修謁雍舍怒待之粲神情閑邁舉止抑揚雍目之不覺解顏坐事免後宣武欲觀其風度令傳詔就家急召之須臾間使者相屬合家恒懼粲更恬然神色不變帝嘆異之時僕射高肇以外戚之貴勢傾一時朝士咸望塵拜謁粲唯長揖而已人責之粲曰何可自同凡俗也曾詣清河王懌下車屬暴雨粲容步舒雅不以霑濡改節乃令人持蓋覆之歎曰何代無奇人後爲揚州大中正中書令明帝釋奠爲侍講轉金紫光祿大夫節閔初復爲中書令正月晦臨洛濱粲起御前再拜上壽酒帝曰卿昔戒北海以酒今何異於往情粲曰北海志在沈湎故諫其所失

陞下齊聖溫克敢獻微誠帝爲命酌孝武初出爲驃騎大將軍膠州刺史禱雨海神直據胡牀左右言例皆拜謁祭曰五嶽視三公四瀆視諸侯安有方伯致禮海神卒不肯拜時青州賊耿翔乘其無備掩襲州城尋爲翔害送首於梁子含字文若員外散騎侍郎

裴衍字文舒梁弟學識優於諸兄才亦過之事親以孝聞兼有將略仕齊位陰平太守歸魏授通直郎衍堅辭宣武末出山厯建興河內二郡太守廉貞寡欲善撫百姓人吏追思之孝昌初梁將曹敬宗寇荊州衍太破之荊州圍解除北道都督鎮鄴西之武城封安陽縣子密表相州刺史安樂王鑒異圖詔衍與都督源子邕李神軌等討平之除相州刺史北道大都督進封臨汝縣公與子邕北討葛榮軍敗見害贈車騎

大將軍司空相州刺史子嵩襲父爵嵩子纂遼西太守循太
原太守

裴慶孫字紹遠聞喜人良從父兄子性倜儻重然諾正光末
爲募人別將討吐京胡薛悉公馬牒騰大戰雲臺郊賊衆大
潰後賊復鳩集北連蠡升南通絳蜀又爲別將從軹關入討
深入二百餘里至陽胡城朝廷遂立邵郡因以慶孫爲太守
慶孫務安輯之咸來歸業爲人任俠有氣鄉曲壯士好事者
多相伎附四方游客恆有百餘與諸才學士咸相交結是以
爲時所稱

以上絳州

右後魏三十七人

龐蒼鷹太原人交游豪俠厚待賓旅居於州城齊高祖客其
舍初居處於蝸牛廬中蒼鷹母數見廬上赤氣屬天蒼鷹亦

知高祖有霸王之量每私加敬割其宅半以奉高祖由此遂
蒙親識高祖牧晉州引爲兼治中從事史行義甯郡事及義
旗建蒼鷹乃棄家間行歸高祖高祖以爲兼行臺倉部郎中
卒於安州刺史

王則字元軌太原人少驍果有武藝初隨叔老生征討有戰
功賜爵白水子元顯殺老生則奔廣州拒顯顯敗爲東徐州
防城都督擊元悅偏師破之行北徐州事後歸神武天平初
頻以軍功都督荊州刺史有威武邊人畏伏渭南之役爲西
師圍逼棄城奔梁尋放還元象初爲洛州刺史以前後勳封
太原縣伯則性貪洛京諸像毀以鑄錢時號河陽錢以武用
除徐州刺史送晉陽卒贈司空謚烈懿弟敬寶東廣州刺史
攻建鄴不克死

以上太原府

范舍樂代人有武藝筋力絕人從神武出山東位東雍州刺史開府儀同三司封平舒侯

康德代人從神武出山東歷數州刺史并省尙書左僕射開

府儀同三司封新蔡王

以上大同府

劉貴

墓志作劉懿字貴珍詳見金石記

秀容陽曲人剛格有氣斷歷余朱榮

府騎兵參軍普泰初行汾州事棄戍歸齊神武累遷御史中尉肆州大中正加開府西道行臺僕射貴視下如草芥性峭直無所迴避與神武布衣舊特見親重卒贈太保太尉公錄尙書事諡忠武齊初祭其墓皇建中配享神武廟庭次子洪徽嗣樂平縣男卒贈都督燕州刺史

忻州

右東魏五人

裴諏之字士正聞喜人佗次子少好儒學釋褐太學博士嘗

從常景借書百卷十許日便返景疑其不能讀每卷策問應
答無遺景歎曰應奉五行俱下福衡一覽便記今復見之於
裴生矣楊惜闔門改葬託誼之頓作十餘墓誌文皆可觀讓
之誼之及皇甫和和弟亮並知名洛下時人語曰誼勝於讓
和不如亮司空高乾致書曰相居爲戶曹參軍誼之復書不
受署沛王開大司馬府辟爲記室遷鄴後誼之留在河南西
魏領軍獨孤信入據金墉以誼之爲開府屬號曰洛陽遺彥
信敗誼之居南山洛州刺史王元軌召爲中從事西師忽至
遂隨入關周文帝以爲大行臺倉曹郎中卒贈徐州刺史

絳州

宇文洛生字任俠代武川人好施愛士北州賢俊皆與之遊
而才能多出其下及葛榮破鮮于修禮以爲漁陽王仍領父
肱餘衆時人皆呼爲洛生王洛生善撫將士是以克獲常冠

諸軍爲爾朱榮所害保定初追贈大將軍封莒國公諡莊子
菩薩爲齊神武所害保定初追贈大將軍小宗伯襲爵諡穆
以晉公護子嗣

宇文測字澄鏡代武川人文帝族子高祖中山曾祖豆頹祖
騏驎父永仕魏並顯達測性沈密少篤學位司徒右長史尙
宣武女陽平公主拜駙馬都尉孝武疑齊神武詔測詣周文
密爲之備還封廣川縣伯西遷進爵爲公周文爲丞相以測
爲右長史委以軍國厯位侍中開府儀同三司行汾州事政
在簡惠頗得人和地接東魏數相抄竊有獲其爲寇者測皆
命解縛引與相見如客禮設宴放還東魏人大慙兩界遂通
慶弔時論方之羊叔子或有告測者周文怒曰測爲我安邊
何爲間骨肉命斬之仍許測便宜從事轉行綏州事河冰合

突厥每來寇常預遣居人入城堡以避測至皆令安堵於要路數百處多積柴仍遣斥堠知其動靜突厥果來積柴處一時縱火突厥謂大軍至懼而遁走自是不敢復至因請置戍兵以備之卒於太子少保文帝親臨勸焉令水池公監護喪事諡曰靖測性仁恕好施與在洛陽日曾被盜竊州縣擒盜測恐坐以死不認所失物遇赦免盜感恩請爲測左右測從孝武西遷事極狼狽盜亦從入關無異志子該嗣位除州刺史以上歸殺道

右西魏三人

王思政太原祁人漢司徒允之後父祐州主簿思政容貌魁梧有籌策解褐員外散騎侍郎北海王顥討万俟醜奴宿勒明達政隨軍謀議並與參詳時孝武在藩引爲賓客及卽位

委以心膺封祁縣侯爲武衛將軍齊神武潛有異圖帝以思
政可任大事拜使持節中軍大將軍大都督總宿衛兵思政
曰洛陽四面受敵非用武之地關中有崤函之固且士馬精
彊宇文夏州糾合同盟願立功効若聞車駕西幸必當奔走
奉迎藉天府之資因已成之業一二年內修復舊京何慮不
克帝深然之及西遷進太原郡公拜光祿卿并州刺史加散
騎常侍大都督思政自以非相府之舊每不自安周文帝在
同州宴集出錦罽及雜綾絹令諸將持蒲又解所服金帶令
徧擲曰先得盧者卽與之羣公莫能得次至思政乃斂容跪
而誓曰王思政羈旅歸朝蒙宰相國士之遇方願盡心効命
上報知己若此誠有實令宰相賜知者願擲卽爲盧不然便
當殺身以謝所奉辭氣慷慨一座盡驚卽拔佩刀橫膝上拊

髀擲之比周文止之已擲爲盧矣徐乃拜而受帶自此朝寄更深及河橋之戰下馬用長稍左右橫擊被重創問絕會蘇帳下督雷五安扶上馬夜久方得還軍仍鎮宏農除侍中東道行臺思政以玉壁地險要請築城卽營度移鎮遷汾晉并三州諸軍事并州刺史行臺如故仍鎮玉壁八年東魏來寇不能克授驃騎大將軍開府儀同三司高仲密來附驛召思政將鎮成皋復鎮宏農思政令開城門解衣而臥數日後東魏將劉豐生率數千騎至城下憚不敢進引還於是修城郭起樓櫓營田農積芻秣宏農有備自思政始十二年加特進兼尙書左僕射行臺都督荊州刺史命都督蘭小歡繕修城塹掘得黃金三十斤夜中密送至旦思政召佐史曰人臣不宜有私悉封金送上周文嘉之賜錢二十萬思政之去玉壁

也命舉代人乃進所部督韋孝寬後卒能全城時論稱其知人十三年侯景請援思政以爲若不因機進取後悔無及卽率荊州步騎萬餘從魯關向陽翟東魏將高岳等收軍而遁思政入守潁川知景詭詐密追助景扞禦賀蘭願德分布諸軍據景七州十二鎮周文乃以所授景使持節太傅大將軍兼尚書令河南大行臺河南諸軍事回授思政思政唯受河南諸軍事十四年拜大將軍九月東魏太尉高岳行臺慕容紹宗儀同劉豐生等率步騎十萬來攻潁川築土山以臨城中飛梯火車盡攻擊之法思政亦作火積因迅風投土山又射火箭燒其攻具仍募勇士縋城出戰據兩土山置樓堞以助防守齊更益兵堰洧水以灌城城多崩頽岳悉衆苦攻思政身當矢石與士卒同勞苦岳更修堰堰成水大至城中泉

涌溢懸釜而炊糧力俱盡慕容紹宗劉豐生及慕容永珍共乘樓船望城令善射人俯射城中大風暴起船飄至城下城上人以長鉤牽船弓弩亂發紹宗窮急投水死豐生浮向土山復生矢斃擒永珍思政曰僕破亡在於晷漏誠知殺卿無益然人臣之節守之以死乃流涕斬之并收紹宗等屍以禮埋瘞齊文襄率步騎十萬來攻思政率左右據土山西向再拜便欲自刎而文襄告城中人曰大將軍身有損傷親近左右皆從大戮都督駱訓固止之不得引決齊遣趙彥深牽手下引見文襄辭氣慷慨涕淚交流無撓屈之容文襄以其忠於所事接遇甚厚思政初入潁川士卒八千人被圍既久城中無鹽腫死十七八及城陷存者纔三千人雖外無救援亦無叛者思政不營貲產嘗賜園地家人種桑果雜樹怒曰何

奴未滅去病辭家況大賊未平欲事產業豈所謂憂公忘私邪命拔而棄之齊初爲都官尙書儀同三司卒贈本官加兗州刺史初思政在荊州自武關以南延袤一千五百里置三十餘城竝當衝要凡所舉薦咸得其才子康沈毅有度量爲周文親信思政陷後增邑三千五百戶襲太原公除驃騎大將軍侍中開府儀同三司康弟揆先封中都縣侯增邑一千五百戶進公揆弟邗封西安縣侯邗弟恭忠誠縣伯恭弟幼顯親縣伯康姊封齊郡君康兄元遜亦陷潁川封子景晉陽縣侯十六年東伐加康使持節大都督以思政部兵配之廢帝二年隨尉遲迥征蜀鎮天水郡爲郿州刺史武成末除匠師中大夫轉載師保定三年歷安襄二州總管位柱國入隋終汴州刺史

太原府

薛修義字公讓河東汾陰人曾祖紹魏七兵尚書祖壽仁秦州刺史汾陰公父寶集定陽太守修義少而俠輕財重義魏正光末募得七千餘人假安北將軍西道別將以軍功拜龍門鎮將後宗人鳳賢等作亂圍鎮城修義亦自號黃鉞大將軍詔都督宗正珍孫討之軍至修義表乞一大將招慰鳳賢等猶據險不降與書降之授鳳賢龍驤將軍陽夏子改封汾陰縣侯孝莊以修義爲宏農河北河東正平四郡大都督齊神武爲晉州刺史相待甚厚及韓陵之捷行并州事孝武入關神武以修義爲關右行臺自龍門濟河招下西魏北華州刺史薛從禮沙苑之敗修義前曰若失守晉州則請誅遂行晉州事西魏儀同長孫子彥圍逼城下開門伏甲待之子彥不測虛實遁去神武嘉之就拜晉州刺史後除齊州刺史以

軍功進正平郡公加開府天保中卒於太子太保贈司空子
交殊嗣修義從弟嘉族亦豪爽從平韓陵歷華揚二州刺史
卒官子震字文雄位廉州刺史亦著軍功又歷南汾譙二州

刺史

蒲州府

段琛字懷寶代人少有武用從神武出山東起兵天保中開
府儀同三司兗州刺史

庫狄伏連字仲山代人事尒朱榮至直閣將軍後從神武賜
爵虵邱男天保初儀同三司尋加開府性質朴勤公事直衛
宮闕曉夕不離帝所願以此見知然恠而愚爲鄭州刺史居
室患蠅杖門者曰何故聽入武平中封宜都郡王除領軍大
將軍尋與瑒瑒王矯殺和士開伏法

以上大府

尉景字士眞善無人性溫厚頗有俠氣初從尒朱榮以軍功

封博野縣伯後從神武起兵韓陵之戰唯景失利神武留景鎮鄴進封公景妻常山君神武姊也每有軍事景與庫狄干常被委重轉冀州刺史改封長樂郡公厯太保太傅坐匿亡兒禁止使崔暹謂文襄曰語阿惠兒富貴欲殺我邪神武泣詣闕曰臣非尉景無以至今日三請乃許黜爲驃騎大將軍開府儀同三司神武造景景悲臥不動叫曰殺我時趣邪常山君曰老人去死近何忍煎迫至此又曰我爲爾汲水舐生因出其掌神武撫景爲之屈膝先是景有果下馬文襄求之景不與曰一馬亦不得畜耶神武杖文襄常山君泣救之景曰小兒慣去放使作心腹何須乾啼濕哭不聽打耶尋授青州刺史操行頗改自姓安之徵授大司馬卒於州贈太師尚書令齊初以景元勳祭其墓皇建初配享神武廟追封長樂

王子粲少愿顯職天保中封庫狄干等爲王粲以父不預王爵閉門不朝帝使就宅問之隔門謂使人曰天子不封粲父作王粲不如死文宣親詣其宅慰之尋追封景長樂王粲襲位司徒太傅卒子世辯嗣隋開皇中卒於浙州刺史

步大汗薩代郡西部人祖榮代郡太守父居龍驤將軍領人別將薩初從尔朱榮入洛及平葛榮累功爲都督又從爾朱兆入洛及韓陵之敗降神武遷車騎大將軍封行唐縣公晉州刺史齊初改義陽郡公

以上朔平府

裴讓之字士禮聞喜人侘子年十六喪父殆不勝哀母辛氏泣撫之曰弃我滅性得爲孝乎由是自勉好學清明俊辯早得聲譽魏天平中舉秀才高第遷屯田主客郎中省中語曰能賦詩裴讓之爲太原公開府記室與楊愔友善相遇則清

談竟日情每云此人風流警拔裴文季爲不亡矣弟二弟諷之奔關右兄弟五人皆拘繫齊神武問云諷之何在答曰昔吳蜀二國諸葛兄弟各得盡心况讓之老母在此君臣分定失忠與孝愚夫不爲伏願明公以誠信待物若以不信處物物亦安能自信以此定霸猶卻行而求道耳神武喜其言兄弟俱釋厯文襄大將軍主簿兼中書舍人後兼散騎常侍文襄入朝讓之導引文儀阻藉文襄目之曰士禮佳舍人也遷長兼中書侍郎領舍人齊受禪靜帝遜居別宮與諸臣別讓之流涕歔歔以參掌儀注封甯都縣男除清河太守姦吏欽迹盜賊清靖侍中高德政與讓之不協密奏言陛下受祥之時讓之眷戀魏朝嗚咽流涕比爲內官情非所願旣而楊愔請救之云罪不合死文宣大怒謂愔曰欲得與讓之同冢耶

於是無敢言者竟賜死

裴謀之字士令佗第四子少有風格邢邵每云我裴四齊武
成爲開府辟爲參軍掌書記

裴謁之字士敬佗第六子少有志節好直言文宣末年昏縱
朝臣罕有言者謁之上書正諫言甚切直文宣將殺之白刃
臨頸謁之辭色不變帝曰癡漢何敢如此楊愔曰望陛下殺
以取後世名帝投刀歎曰小子望我殺爾以取後世名我終
不成爾名遣人送出齊亡卒於壺關令

楊標字顯進正平高涼人祖貴父猛並爲縣令標少豪俠有
志氣魏孝昌中大司馬城陽王元徽逃難投標藏而免之孝
莊立徽復爲司馬標以義烈聞擢拜伏波將軍給事中元顥
入洛孝莊北度及爾朱榮奉帝南討至馬渚標具船濟王師

顯平封肥如縣伯加鎮遠將軍步兵校尉行濟北郡事進都督平東將軍大中大夫從孝武入關進爵侯加撫軍將軍銀青光祿大夫周文遣標間行詣鄴覘察使還稱旨授通直散騎常侍車騎將軍稽胡恃險不賓命標慰撫能得邊情誘化酋渠多來款附從攻宏農拔之微行詣邵郡與土豪王覆憐等密相應會內外俱發拔郡禽守程保及縣令等以功授大行臺左丞更爲經略旬月之間攻拔正平河北南汾二絳建州大甯等城以功行正平郡事左丞如故齊神武敗於沙苑標分兵邀截殺傷甚衆東雍州刺史司馬公懼標威聲棄城遁走標遂移據東雍州表行建州事標威恩夙著所經之處多羸糧附之再擊破東魏軍大獲甲仗東魏遣太保尉景攻陷正平復遣行臺薛修義與斛律俱相會故衆漸盛標孤軍

無援謀欲拔還遂僞爲周文書云已遣軍四道赴援因令漏泄使所在知之於夜拔走敵不敢迫朝廷嘉其權以全軍授建州刺史時東魏以正平爲東雍州遣薛榮祖鎮之乃先遣奇兵急攻汾橋榮祖盡出城中戰士拒守標從他道濟襲克之進驃騎將軍轉正平郡守又擊破東魏南絳郡錄前後功封邵陽縣伯苾山之戰東魏將侯景率騎追標標與儀同常法保同心抗禦且戰且前景乃引退復授建州刺史鎮車箱標久從軍役未及葬父表請遷葬詔贈其父車騎大將軍儀同三司晉州刺史贈其母夏陽縣君並給儀衛州里榮之齊神武圖玉壁別令侯景趣齊子嶺標率騎迎禦景聞標至斫木斷路者六十餘里猶驚而不安遂退還河陽其見憚如此十二年授大都督加晉建二州諸軍事進儀同三司尋加開

府復鎮邵郡十六年改封華陽縣侯保定四年遷少師大軍
圍洛陽詔標出軹關標鎮東境二十餘年數與齊人戰常克
獲遂有輕敵之心深入敵境又不設備敗降於齊標之立勳
也有慷慨壯烈之志軍敗就虜以求苟免時論鄙之周武猶
錄其功不以爲罪令其子襲爵以上
絳州
庫狄盛字安盛懷朔人性和柔少有武用初爲神武親信都
督從征伐累遷幽州刺史封長廣縣公齊受禪改封華陽縣
公後拜特進卒贈太尉公

暴顯字思祖魏郡廩丘人祖喟爲朔州刺史因家焉父誕恆
州刺史樂安公顯幼見一沙門曰大必爲良將貴極人臣及
長善騎射從魏孝莊獵一日于獲禽獸七十三後從齊神武
起義累遷北徐州刺史封屯留公天保中合肥被圍遣顯與

步大汗薩等攻梁北徐州擒其刺史王彊天統中位特進封
定陽王卒

以上歸綏道

右北齊十二人

郭彥太原陽曲人居馮翊父允靈武令彥少知名周文臨雍
州辟爲西曹書佐遷虞部郎中大統十二年選當州首望統
領鄉兵除帥都督以居郎官著稱封龍門縣子進大都督恭
帝元年除兵部尙書仍以本兵從柱國于謹南伐江陵進驃
騎大將軍開府儀同三司進爵爲伯六官建拜戶部中大夫
孝閔踐阼出爲澧州刺史蠻左生梗不營農業彥勸以耕稼
人皆務本先是澧州糧乏令荊州遞送自彥莅職倉庾充實
無轉輸之勞齊南安城主馮顯密遣使歸降柱國宇文貴令
彥應接時齊人先令顯率所部送糧南下彥懼其衆不從於

路邀之顯因得自拔其衆拒戰彥縱兵奮擊竝虜獲之遂襲南安有其城進爵懷德縣公入爲工部中大夫保定四年晉公護東討彥從攻軍次豫州使彥鎮焉天和中爲隴右府總管府長史卒於官贈小司空宜鄜丹三州刺史

唐邕字道和太原晉陽人其先自晉昌徙焉父靈芝魏壽陽令贈司空邕少明敏有材幹初直神武外兵曹以幹濟見知擢文襄大將軍督護文宣嗣事夜中召邕支配將校造次便了帝甚重之天保初遷給事中兼中書舍人封廣漢鄉男從征奚監騎兵事文宣頻出塞邕必陪從專掌兵機承受敏速自軍吏已上勞效由緒無不諳練占對如響或御前簡閱多不執文簿唱官名未嘗謬誤七年講武羊汾隄總諸軍節度事畢仍監宴射帝親執其手引至太后前坐丞相斛律金上

啟太后云邕一人當千仍別賜錢絲又嘗白太后云邕手作
文書口且處分耳又聽受實是異人一日中六度賜物又解
青鼠裘賜之曰朕意在與卿共做除兼給事黃門中書舍人
帝嘗登并州童子佛寺望并州城左右曰此金城湯池帝曰
我謂唐邕是金城此非也後謂邕云高德正妄說卿短而薦
主書郭敬朕已殺之卿劬勞既久欲除卿作州代卿者實不
可得所以遂停或切責侍臣云觀卿等不中與唐邕作奴其
愛遇如此孝昭作相署相府司馬皇建元年除給事黃門侍
郎太甯元年除大司農卿河清元年突厥入寇遣邕驛赴晉
陽募集兵馬在路聞寇將逼斟酌事宜改救更促期會由此
兵士限前畢集後拜侍中并州大中正護軍將軍從武成幸
晉陽至武軍驛帝將殺虞候都督范洪邕諫曰因酒殺人恐

招橫議洪因得免邕又曰軍人教習田獵令十二月別三圖殊爲疲弊請每月兩圖又奏河陽晉州與周連境請於河陽懷州永橋義甯烏籍各徙六州軍人并家立軍府安置以備機急之用竝從之尋出爲趙州刺史侍中護軍大中正悉如故謂曰朝臣未有帶侍中護軍中正臨州者以卿舊勳故有此舉放卿百餘日休息至秋當卽召邕抑挫豪強公事甚理尋除中書監仍侍中遷尙書右僕射武平初御史劾之除名後以舊恩復除將軍開府累遷尙書令封晉昌王令赴晉陽監勒諸軍事討高思好事平錄尙書事高阿那肱譖之由是被疎七年幸晉陽敕斛律孝卿總騎兵事多自決帝歸鄴邕懼那肱譖愬恨孝卿輕已遂留晉陽與莫多婁敬顯等樹安德王爲帝尋降周例授上開府儀同大將軍再遷戶部轉少

司馬封安福郡公遷鳳州刺史隋開皇初卒邕性識明敏在齊一代典執兵機凡九州軍士四方勇募強弱多少番代往還器械精粗糧儲虛實精心勤事莫不諳知自大甯及武平府藏漸虛邕支度取捨大有裨益長子君明開府儀同三司開皇初卒於應州刺史次子君徹中書舍人隋戎順二州刺史大業中卒於虎賁郎將少子君德以邕入周伏法

太原府

陸騰字顯聖代人旭子少慷慨有大節從尒朱榮平葛榮以功賜爵清河縣伯遷通直散騎常侍孝武西遷時使青州遂留鄴爲陽城郡守大統九年大軍東討陽城被執周文釋而與語騰盛論東州人物敘述時事辭理抑揚周文嘆曰卿真不肯本也卽拜帳內大都督除太子庶子遷武衛將軍騰旣爲周文所知思欲立功安康賊黃衆寶等作亂詔騰率軍大

破之還拜龍州刺史使通江由路直出南秦周文謂曰此卿取柱國之日卽解所服金帶賜之州人李廣嗣李武等憑據巖險騰密令多造飛梯襲執廣嗣等於鼓下斬之進位驃騎大將軍開府儀同三司轉江州刺史進爵上庸縣公復擊殺陵州木籠獠等周明帝初陵眉等八州夷夏反攻破郡縣騰率兵討平之齊公憲作鎮於蜀以騰爲隆州刺史兵馬鎮防皆委騰統攝趙公招代憲復請留之遷隆州總管領刺史保定二年資州石槃人據險自守騰率軍討破之而蠻獠恃險畔服無常騰量山川形勢隨便開道莫不畏威承風稽顙請服所開之路多得古銘胥是諸葛亮桓溫舊道鐵山獠抄斷內江路使驛不通騰進軍討之一日下其三城招納降附者三萬戶帝以騰母在齊未令東討晉公護詭言齊已誅公母

兄騰乃發哀泣血志在復讐晉公護東征命副齊公憲東伐
天和初信州蠻蠻據江硤叛詔騰討之所向摧破築京觀以
旌武功又討平涪陵郡守蘭休祖之亂巴蜀悉定詔令樹碑
記功績焉騰自在龍州至是前後破平諸賊凡賞得奴婢八
百口牛馬稱是四年遷江陵總管陳遣其將章昭達圍江陵
騰夜開門奮擊大破之陳人決龍川甯朔隄引水灌江陵城
騰親率將士戰於西隄陳人乃遁加位柱國進爵上府郡公
建德二年徵拜大司空尋出爲涇州總管宣政元年冬薨於
京師贈太尉公諡曰定子元嗣元宇士鑒仕齊爲奉朝請成
平縣令齊平武帝見元特加勞勉卽拜地官府都上士大象
末爲隋文相府內兵參軍元弟融宇士傾最知名少歷顯職

大象末位至大將軍定陵縣公

大同府

叱列伏龜字摩頭陁代郡西部人其先爲部落大人魏初入
附世爲第一領人酋長龜容貌瓌偉腰帶十圍進止詳雅兼
有武藝嗣父業復爲領人酋長孝昌三年以別將從長孫承
業西征累遷金紫光祿大夫從還洛授都督遂爲齊神武所
寵任授大都督沙苑之敗來降周文解縛禮之仍以邵惠公
女妻之大統四年封長樂縣公常從征討亟有戰功歷侍中
驃騎大將軍開府儀同三司恆州刺史卒子椿嗣椿字干年
明帝時位驃騎大將軍開府儀同三司改封永世縣公天和
初除左宮伯進位大將軍

朔平府

裴藻河東聞喜人字文芳少機辯有不羈之志爲子如太傅
主簿消難鎮北豫又以爲中兵參軍入周封聞喜縣男除晉
州刺史

裴鴻聞喜人少恭謹有幹略厯官內外周天和初拜郢州刺史轉襄州總管府長史賜爵高邑縣侯從衛公直南征敗沒卒於陳贈豐資遂三州刺史

裴忌字無畏聞喜人之平子少聰敏有識量涉史傳爲當時所稱招集勇力隨陳武帝征討王僧辨弟僧智據吳郡黃他攻之不能克命忌勒部下精兵自錢塘直趨吳郡夜至城下鼓譟薄之僧智疑大軍至輕舟奔杜龕忌入據吳郡授吳郡太守天嘉五年累遷衛尉卿封東興縣侯華皎稱兵委忌總知中外城防諸軍事宣帝初改樂安縣侯厯都官尙書北伐以本官監吳明徹軍淮南平授豫州刺史忌善於綏撫甚得人和及呂梁軍敗囚於周授上開府隋時卒於長安年七十

三

裴謙之字士平佐第三子七歲便勤學早知名累遷司徒主簿楊愔每稱歎曰河東士族京官不少唯此家兄弟全無鄉音謙之雖年少不妄交游唯與隴西辛術趙郡李繪頓邱李構清河崔瞻爲忘年友昭帝梓宮將還鄴轉儀曹郎尤悉歷代故事儀注喪禮皆能裁正爲許昌太守客旅過郡皆出私財供給代下日爲吏人所懷仕周卒伊川太守

以上
梓州

宇文護字薩保代武川人顯少子幼方正有志度特爲祖肱所愛文帝入關以年少不從魏普泰初始自晉陽至平涼時年十七文帝諸子並幼遂委以家務內外無不嚴肅文帝歎以爲類已初爲都督封永池縣伯大統十三年進封中山公十五年遷大將軍拜司空文帝西巡至牽屯山遇疾召護至涇州曰吾形容若此必不濟諸子幼天下事以屬汝護涕泣

奉命行至雲陽祕喪至長安綱紀內外撫循文武衆心乃定
尋拜柱國諷魏以禪代事孝閔初拜大司馬封晉國公邑萬
戶又拜大冢宰尋幽孝閔迎明帝立之二年拜太師賜路車
冕服封子至爲崇業郡公又拜雍州牧賜金石之樂武成元
年護上表歸政許之軍國大事尙委於護又有膳部下大夫
李安之謀護立武帝百官總已以聽左右十二軍總屬相府
凡徵發非護書不行護第屯兵禁衛盛於宮闕事無巨細皆
先斷後聞保定元年爲都督中外軍令五府總於天官詔同
州晉國第立德皇帝別廟使護祭焉三年詔自今詔誥及百
司文書並不得稱公名以彰殊禮先是護母閭與皇帝四姑
及諸戚屬並沒齊皆被幽繫護每遣間使尋求莫知音息至
是並許還朝且請和好四年皇姑先至齊主以護權重乃留

其母以爲後圖後母至舉朝慶悅大赦天下每四時伏臘武帝率諸親戚行家人禮稱觴上壽榮貴之極振古未聞天和二年護母卒賜軒懸之樂六佾之舞七年三月十八日帝以玉珽擊之踣地衛王直出斬之收護子柱國譚國公會大將軍莒國公至崇業公靜正平公乾嘉及乾基乾光乾蔚乾祖乾威等并其黨時護世子訓爲蒲州刺史夜遣柱國越公盛乘傳鎮蒲州徵訓及昌城公操同誅三年詔復先封諡曰蕩楊纂廣甯人父安仁魏朔州鎮將纂少慷慨有志略勇力兼人年二十從齊神武起兵信都軍功稍遷武州刺史以賞薄懷怨每歎曰大丈夫富貴何必故鄉若以妻子經懷豈不沮人雄志大統初間行入關授征南將軍大都督封永興縣侯從周文解洛陽圍河橋芒山之戰纂每先登軍中推其敢勇

遷驃騎大將軍開府儀同三司加侍中進爵爲公賜姓莫胡
盧氏授岐州刺史周孝閔踐阼進爵宋熙郡公保定元年位
大將軍改封隴東郡公除隴州刺史從隋公楊忠東伐至并
州而還天和六年轉華州刺史性質樸不識文字前後莅職
但推誠信而已吏人以其忠恕頗亦懷之尋卒於州

庫狄昌字持德神武人少便弓馬有膂力每以將帥自許從
爾朱天光定關中又從賀拔岳征討岳被害胡戴周文從平
侯莫陳悅後從迎孝武復潼關改封長子縣子大統初累遷
開府儀同三司進方城郡公周初拜大將軍卒

傅伏太安人以戰功至開府永橋領人大都督周武帝攻河
陰伏自永橋夜入中潭城南城陷被圍二旬不下救至周師
還後除東雍州刺史周克晉州執行臺尉相賁招伏伏不從

及克并州遣韋孝寬以伏子世寬來招伏授上大將軍武鄉郡公以金瑪瑙二酒鍾爲信伏不受曰事君有死無二此兒爲臣不能竭忠爲子不能盡孝人所警疾願卽斬之以號令天下周武自鄴還至晉州遣高阿那肱等臨汾召伏伏聞後主被獲仰天大哭率衆入城於廳事前北面哭良久然後降周武詰之伏流涕曰臣三世衣食齊家革命不能自死羞見天地周武親執手曰爲臣當若此朕平齊唯見公一人授上儀同謂後主曰朕前三年決意取河陰正爲傳伏不可動公當時賞授何其薄也賜伏金酒卮後爲岷州刺史卒

以上歸義道

右北周十二人